

TURE XXXI.—NO TE TANGATA AKATAU I TE TANU KUI, I TONA KAINGA.

E tanu koe, e tama, i toou kainga, kia maata te kai, e kai naau e taau vaine, e taau tamariki; ei angai ei i taau puaka, e taau manu, kia matu, ei oko kakau noou, e taau vaine, e ta korua tamariki, auraka koe e keia aere ua i ta tetai kai, kua o mai te Atua i ou rima, ei rave angaanga, ei tanu kai, kia tanu koe i te ua a toou rima i tanu ra, Ka riro ia ei meitaki no te vaine, e nga tamariki, rekareka atura koe i reira, ma te akameitaki i te Atua, i te Atua o te au meitaki ravarai. E kia kore ra koe e tanu i toou kainga, aere ua atura koe ki te keia i ta tetai kai, ei angai i taau vaine, ma taau tamariki.

Ka akavaia koe, tera taau utunga, e Akatah, ka tutu aereia toou ingoa, ei akakite i toou akatau i te tanu kore, kia akama koe, ko taau ia utunga, e ka topaia toou ingoa ko te tangata koka ua.

E kia maro koe i te akatau, e kare toou kainga i tanumia tikaia e koe i te mataiti okotai, e akavaia koe, tera te utunga, 10 e taeta purumu, ka akapera ua atu rai i te au mataiti katoa.

TURE XXXII.—NO TE APINGA AKARUKE.

Kia akaruke tetai tangata i tana apinga, kia kitea ra e tetai tangata ki te ngai i topa'i, auraka aia e uuna, kia uuna koe ka akavaia koe, tera taau utunga, e 5 dala.

TURE XXXIII.—NO TE TANGATA ORI UA I TE PO.

Ka aere rai te tangata tautai ika i te po, kare ia e akokoreia, ka aere rai te aronga mako tikai i te po ki to ratou aerenga, kare ia e akokoreia.

Ko te tangata mako kore, koka aere ua'i i te po, Eaa ua akera tana pu aere? kia kitea aia ki roto i te ora 9, i te aere ua anga i te po, ka akavaia aia, tera te utunga e 5 te roa i te purumu, e 2 te pararauare.

TURE XXXIV.—NO TE RANGATIRA PAI KEIA TANGATA.

Auraka te rangatira pai e rave keia ua i te tangata no uta i te enua nei, ki runga i toua pai, e akatika ana te tuatua ki te ariki, e kia tika i reira, ka rave ei, e kare e tika, ka akaruke.

Auraka te koreromotu e papau ua ia i tetai are o te papaa noo ua i runga i te enua, i mua i te aroaro o te ariki ra, e o te orometua papau ei, kia tika tikai te tuatua i runga i te pepa.

TURE XXXV.—NO TE VAINA KIA KEIA IA.

Kareka kia aere tetai tangata ki te keia vaine, i roto i to tetai are, kareka ki o te ariki, ki o te orometua, ki o te tangata rikiriki, ka akavaia aia, tera tana utunga no te va'i are, 10 dala.

TURE XXXVI.—NO TE AU PAI TUTAU KI RARO I TE AVA.

Auraka te au rangatira pai e taruna i te ava me tutau to ratou au pai, auraka ratou e uri i te toka mei roto i to ratou au pai ei taruna i te ava, kare takiri te reira e tika, ko te rangatira e akapera ka tutaki aia, 10 dala.

TURE XXXVII.—TURE NO TE KAVA I RUNGA I TE AU PAI TUTAU I ROTO I TE AVA, KARE E TIKI KIA TUKUIA KI RUNGA I TE ENUA NEI KO RAROTONGA.

Tera te tu, ka aere te Tiaki Ava ki runga i te pai ka akara i te Kava, mei te mea e Kava, ka tuku te Tiaki Ava i te akairo ki runga i te au pia Kava e te paero Kava, e te moina Kava takiekie, e te au moina rikiriki katoa, kia oti ka aere te Tiaki Ava ki uta, kia tae ra ki te ra e aere ei te Pai, ka oki te Tiaki Ava ka akara i te Kava e te akairo, mei te mea e kua raveia te akairo, ka mou te rangatira i te auri; ka akavaia aia e utunga maata. Koia i akakino i te akairo, mei te mea e kua ngaro tetai paepae, te paero e te moina takiekie, e te moina rikiriki, ka akautungaia aia, 100 dala.

TURE XXXVIII.—NO TE KAI OU.

Kare takiri e akatikaia te kaion kio te au Papaa, ko te tangata e maro ki te kaion na te ture aia e rava e te enua, ae, aua e maro, oatu omai, meitaki koe meitaki au, e te papaa e, auraka koe e tuku i to apinga ki te tangata ei kai ou, me tuku koe na te re koe.

TURE XXXIX.—NO TE AU PAI AERE MAI KI TE ENUA NEI KO RAROTONGA.

Tera te tu, ko te pai akateretere aere ua i te pai enua nei, me rave tetai tangata i te ara ki runga i te enua nei no runga i taua pai ra, pai tira tai, tei reira ia, pai tira rua tei reira ia, pai tira toru tei reira ia, poti tei reira ia. Ka akautungaia aia ki te ture enua. Me tutau te pai i te moana ua ka tutaki rai aia, e toru maile mei te enua atu nei ki te moana, ko te au pai ra e akatupu kino i roto i taua toru maile ra, na te ture enua anake e rave i te reira.

TURE XL.—NO TE OKO ANGA.

Auraka te tangata e tari mata ua i te apinga ki te oko anga, tera nga apinga kare e tau kia tari mata ua ki te oko anga, e coffee e copara, me tare meta koe i tanu apinga, ka mou koe i te auri, kia maro a to apinga ei reira koe ka apai ei i to apinga ki te oko aanga, kare koe e ara. Pera katoa te papaa i tana, aua aia e omai i te kakau pe e te moni rava kore, me pera koe na te ture koe, ei apinga meitaki tikai taau e omai, e te moni rava tikai, kare koe e ara i reira.

TURE XLI.—NO NGI TANGATA TAUMARO E TE AKAMA INGI TOTO.

Kia taumaro nga tangata tokorua i tetai tuaina no tetai apinga, e tupu atura to raua pekapeka, moto atura tetai i tetai, maringi atura te toto, mei te mea e toka pei, e matipi, e toki tepa ua mei tei reira te tu, kare i mate te tangata, ka akautungaia aia ko tei maringi te toto, 10 dala.

TURE XLII.—NO TE AKAAU TANGATA.

Auraka te papaa e te maori e akaau tangata mei tetai enua ke mai, kare e akatikaia, ko te tangata e maro i te akaau tangata na te ture aia, tera tana utunga e 20 dala.